

Rajin, ilmu dan amanah harus jadi pegangan hidup - Tun Mahathir

Astro Awani

1 April 2019

Firdaus Azil

Wan Syamsul Amly,

SHAH ALAM: Kerajinan, ilmu dan sifat amanah seharusnya menjadi pegangan hidup yang memastikan kejayaan seseorang individu.

Perdana Menteri Tun Dr Mahathir Mohamad mengingatkan, nilai itu mempengaruhi kehidupan selain faktor yang mengelakkan kegagalan dalam kehidupan.

“Sebenarnya nilai hiduplah yang tentukan kita berjaya atau tidak. Tidak banyak dari nilai hidup yang kita pegang, begitu kuat pengaruhnya terhadap kehidupan kita.

“Saya dapati mereka yang berjaya, semuanya adalah mereka yang rajin, yang sanggup bekerja, yang bekerja kuat.

“Mereka tetap berjaya. Walaupun tidak ada ilmu, berpelajaran, tetapi mereka yang rajin berusaha, rajin mengejar kejayaan tetap akan berjaya,” kata beliau semasa berucap pada Majlis Pelancaran Inisiatif Harimau Asia pada Konvensyen Kebangkitan Harimau Asia di Universiti Teknologi Mara (UiTM) di sini, pada Isnin.

Jelasnya, ilmu tanpa kerajinan tidak boleh menghasilkan apa-apa kejayaan.

“Kalau kita rajin, walaupun kurang ilmu masih boleh berjaya, tapi bila ada kombinasi dengan kerajinan, ia kejayaan.

“Pegangan mereka kepada nilai hidup jumlah nilai hidup yang mereka pegang dan mereka amal dan dengan itu mereka mendapat hasil daripada budaya mereka atau nilai hidup yang dipegang oleh bangsa mereka,

“Sebab itu kita lihat ada bangsa yang berjaya, ada bangsa yang tidak berjaya, ada yang tidak mungkin berjaya,” jelasnya.

Dalam pada itu katanya, setiap bangsa perlu mempunyai rasa malu seperti diamal orang Jepun.

“Kalau ada perasaan malu macam orang Jepun, saya pilih orang Jepun sebab saya kagum dengan mereka. Walaupun mereka jajah kita.

“Tetapi kualiti baik mesti kita akui dan perasaan malu mereka ini adalah begitu, jajah mana mana pihak.

“Mereka malu kalau mereka kalah, tentera mereka, askar mereka, samurai mereka, kalau kalah bunuh diri, dalam pilihan perang dunia kedua, mereka kalah,” ujarnya.

Pada sebelah petang, Ahli Parlimen Port Dickson, Datuk Seri Anwar Ibrahim menggariskan tiga teras utama dalam usaha mengembalikan Malaysia ke persada dunia sekaligus menggapai semula gelaran ‘Harimau Asia’.

Ujarnya, keyakinan, kerangka idea pendorong dan tindakan amal turun ke padang perlu dilaksanakan.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/rajin-ilmu-dan-amanah-harus-jadi-pegangan-hidup-tun-mahathir-202905>